

Odluka kojom se obustavljaju sve isplate sa utvrđenih budžetskih pozicija za potrebe finansiranja političkih stranaka HDZ BiH, SDA, HDZ 1990 – HZ i SBiH...

Koristeći se ovlaštenjima koja su visokom predstavniku dana članom V Aneksa 10 (Sporazum o civilnoj provedbi Mirovnog ugovora) Općeg okvirnog sporazuma za mir u Bosni i Hercegovini (u daljem tekstu: Opći okvirni sporazum), prema kojem je visoki predstavnik konačni autoritet za tumačenje navedenog Sporazuma o civilnoj provedbi Mirovnog ugovora, i članom II 1. (d) prethodno navedenog Sporazuma, koji od visokog predstavnika zahtijeva da olakša rješavanje bilo kojih poteškoća koje se pojave u vezi sa civilnom provedbom Općeg okvirnog sporazuma za mir u Bosni i Hercegovini;

Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da upotrijebi svoj konačni autoritet u zemlji u vezi s tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu s gorenavedenim, “donošenjem obavezujućih odluka, kada to ocijeni neophodnim”, o određenim pitanjima, uključujući i (prema tački (c) stava XI.2) mjere kojima se osigurava implementacija Mirovnog sporazuma na cijeloj teritoriji Bosne i Hercegovine i njenih entiteta koje “mogu obuhvatati mjere protiv osoba na javnim funkcijama (...) za koje visoki

predstavnik ustanovi da su prekršile zakonske obaveze preuzete u skladu s Mirovnim ugovorom ili uvjete za njegovu provedbu”;

Svjestan da je prošlo gotovo osam mjeseci od održavanja općih izbora, a gotovo sedam od osnivanja kantonalnih skupština;

Konstatujući da su određeni politički subjekti u Hercegovačko-neretvanskom kantonu, svojim krajnje neodgovornim ponašanjem, pretpostavili svoje pojedinačne i stranačke interese interesima građana, te tako zloupotrijebili povjerenje svojih glasača i građana uopće;

Osuđujući što, kao rezultat ovog nedgovornog ponašanja političkih subjekata izvršne vlasti u Hercegovačko-neretvanskom kantonu još uvijek nisu formirane i što je tokom cijelog tog perioda na dužnosti vlada u tehničkom mandatu;

Podsjećajući da je, na sjednici koja je održana na nivou političkih direktora 20. oktobra 2006. godine, Upravni odbor Vijeća za implementaciju mira pozdravio održavanje izbora od 1. oktobra i pozvao na što skorije okončanje formiranja vlasti.

Podsjećajući na pismo visokog predstavnika od 11. maja 2007. godine upućenog predstavnicima političkih stranaka, u kojem je istim predstavnicima ukazano na činjenicu da je situacija u Hercegovačko-neretvanskom kantonu neodrživa i upozoreni su da bi visoki predstavnik mogao preduzeti određene mjere u cilju promjene takvog stanja;

Uvjeren da HDZ BiH, SDA, HDZ 1990 – HZ i SBiH, kao politički subjekti u Hercegovačko-neretvanskom kantonu, moraju preuzeti svoj dio odgovornosti za stanje koje se pokazalo kao vrlo nezadovoljavajuće u pogledu izvršnih vlasti u tom kantonu;

Uzevši u obzir i razmotrivši sve navedeno, visoki predstavnik donosi sljedeću:

ODLUKU

kojom se obustavljaju sve isplate sa utvrđenih budžetskih pozicija za potrebe finansiranja političkih stranaka HDZ BiH, SDA, HDZ 1990 – HZ i SBiH iz budžeta Bosne i Hercegovine, budžeta Federacije Bosne i Hercegovine i budžeta Hercegovačko-neretvanskog kantona i umanjuje se finansiranje za potrebe političkih stranaka HDZ BiH, SDA, HDZ 1990 – HZ i SBiH iz budžeta Hercegovačko-neretvanskog kantona

Član 1.

Sve isplate sa utvrđenih budžetskih pozicija za potrebe finansiranja političkih stranaka HDZ BiH, SDA, HDZ 1990 – HZ i SBiH iz budžeta Bosne i Hercegovine, budžeta Federacije Bosne i Hercegovine i budžeta Hercegovačko-neretvanskog kantona za 2007. godinu, odmah se obustavljaju.

Obustava isplate sa utvrđenih budžetskih pozicija za potrebe finansiranja političkih stranaka, utvrđena u stavu 1. ovog člana, ostaje na snazi sve dotle dok Kantonalnu vladu Hercegovačko-neretvanskog kantona ne potvrdi Kantonalna skupština u skladu s članom V.8 Ustava Federacije Bosne i Hercegovine.

Član 2.

Sredstva sa utvrđenih budžetskih pozicija za fiskalnu 2007. godinu, namijenjena za potrebe finansiranja političkih stranaka, koja treba da se isplate iz budžeta Hercegovačko-neretvanskog kantona u korist stranaka HDZ BiH i SDA, ovim se umanjuju za četrdeset posto (40%).

Sredstva sa utvrđenih budžetskih pozicija za fiskalnu 2007. godinu, namijenjena za potrebe finansiranja političkih stranaka, koja treba da se isplate iz budžeta Hercegovačko-neretvanskog kantona u korist stranaka HDZ 1990–HZ i SBiH,

ovim se umanjuju za dvadeset posto (20%).

Član 3.

Ukoliko Skupština Hercegovačko-neretvanskog kantona ne potvrdi Kantonalnu vladu nakon 7. juna 2007. godine, dodatnih dvadeset posto (20%) sredstava sa utvrđenih budžetskih pozicija za fiskalnu 2007. godinu namijenjenih za potrebe finansiranja političkih stranaka, koja treba da se isplate u korist stranaka HDZ BiH, SDA, HDZ 1990–HZ i SBiH u Hercegovačko-neretvanskom kantonu, odbijati će se na sedmičnoj osnovi sve dotle dok Kantonalna vlada ne bude potvrđena.

Član 4.

Ukoliko Skupština Hercegovačko-neretvanskog kantona ne potvrdi Kantonalnu vladu do 28. juna 2007. godine, visoki predstavnik zadržava pravo da donese dodatnu odluku kojom će se umanjiti finansiranje za potrebe političkih stranaka predviđeno u čl. 1. do 3. ove Odluke iz budžeta Federacije Bosne i Hercegovine i/ili budžeta institucija Bosne i Hercegovine.

Član 5.

Ministrima finansija na nivou Bosne i Hercegovine, Federacije Bosne i Hercegovine, odnosno Hercegovačko-neretvanskog kantona, ili svakoj drugoj osobi koja bi eventualno mogla postupati u ime navedenih ministara, ovom se Odlukom naređuje da:

- 1) realiziraju odredbe ove Odluke u mjeri u kojoj se ista na njih primjenjuje;
- 2) u roku od najkasnije tri (3) radna dana od dana potpisivanja ove Odluke, dostave dokaz Uredu visokog predstavnika, u formi pismene garancije, o tome da su odredbe čl. 1. i 2. ove Odluke izvršene; i
- 3) u roku od najkasnije tri (3) radna dana od dana potpisivanja ove Odluke, dostave dokaz Uredu visokog

predstavnik, u formi pismene garancije, o tome da su odredbe člana 3. ove Odluke izvršene.

Ministri finansija, odnosno, u slučaju njihove odsutnosti sve druge osobe koje bi eventualno mogle postupati u njihovo ime, smatrat će se odgovornim za uredno izvršenje ove Odluke.

Član 6.

Ova Odluka ne iziskuje preduzimanje dodatnih proceduralnih radnji i ima veću pravnu snagu u odnosu na bilo koji propis ili zakon koji eventualno može biti u suprotnosti s njom. Ovom Odlukom navedene političke stranke se ni na koji način ne oslobađaju svojih obaveza prema Izbornom zakonu Bosne i Hercegovine ili Zakonu o finansiranju političkih stranaka Bosne i Hercegovine.

Član 7.

Radi otklanjanja svake sumnje, ovim se izričito izjavljuje i ukazuje da je ovdje sadržane odredbe, svaku od njih, utvrdio visoki predstavnik u skladu sa svojim međunarodnim mandatom i da ih, stoga, ne mogu osporavati sudovi Bosne i Hercegovine, niti sudovi njenih entiteta, niti na drugom mjestu, te da se pred bilo kojim sudom ni u jednom trenutku ne može pokrenuti postupak u vezi sa obavezama čije izvršenje iz njih proističe.

Član 8.

Iznos sredstava odbijenih u skladu s čl. 2. i 3. ove Odluke prenosi se na budžetske pozicije koje se odnose na fondove za socijalnu zaštitu/skrb kako slijedi: 614300/JAN17 (*Kućna njega i pomoć u kući*), 614300/JAN022 (*Los Rossales*), 614300/JAN010 (*Sveta obitelj*), 614300/JAM017 (*Pomoć djeci oboljeloj od celijakije*).

Preneseni iznosi iz stava 1. ovog člana smatraju se sredstvima za konkretne projekte, neće imati nikakav utjecaj na finansiranje koje je već predviđeno budžetom Hercegovačko-

neretvanskog kantona za 2007. godinu, i trošit će se isključivo za potrebe štićenika ovih ustanova.

Primatelji sredstava iz stava 1. ovog člana dužni su dostaviti izvještaj Uredu visokog predstavnika, putem Ministarstva finansija Hercegovačko-neretvanskog kantona, o načinu utroška dodatnih sredstava.

Član 9.

Ova Odluka stupa na snagu odmah i odmah se objavljuje u "Službenom glasniku Bosne i Hercegovine", "Službenim novinama Federacije Bosne i Hercegovine" i "Službenim/narodnim novinama Hercegovačko-neretvanskog kantona".

Sarajevo, 29. maja 2007.

Dr. Christian Schwarz-Schilling
Visoki predstavnik